



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

Jammu & Kashmir nem state
jenjang agütsütsüla: Omar Abdullah

Floyd tepsetsang küm 22 tepuokdak
ayutsü obendang agütsü

VOL. XVIII NO. 253 (ADOK 253) DIMAPUR AMUNGNÜ (SUNDAY) AAMI (JUNE) 27, 2021 ₹ 5.00

COVID-19 wara tasembubaji kanga tulu kabo masütsü: ICMR

New Delhi, June 26, 2021 (Agencies): Alima nung COVID-19 wara tasembuba atongtsü saka wara tanabuba amabo masütsü ta Indian Council of Medical Research (ICMR)-i metetdaksüogo.

SARS-CoV-2 menatepba indang mathematical models amshia wara tasembuba indang bushidang wara tanabuba ama tulu kabo masütsü ta bushitet. Iba ya Indian Journal of Medical Research (IJMR) ajanga adokba "Plausibility of a third wave of COVID-19 in India: A mathematical modelling based analysis" nung shia lir.

Researcher temi SARS-CoV-

2 menatepba indang model ka amshia COVID-19 wara tasembuba indang bushidanga liasü. Ajisüaka, researcher temi kechi tensa ajurutsü'ar meshiteter aser lendong tuluba majurutsü atema vaccine agütsüba maparen tuluba inyaktsüla ta shiogo.

Iba study ya Department of Infectious Disease Epidemiology nungi Sandip Mandal aser Nimalan Arinaminpathy, MRC Centre for Global Infectious Disease Analysis Balram Bhargava, ICMR nungi Samiran Panda aser School of Public Health, Imperial College London, UK ajanga züluba lir.

PM Modi-i Covid-19 vaccine agütsüba maparen meyipa repringshi

New Delhi, June 26, 2021 (Agencies): Honibarnü Prime Minister Narendra Modi-i linük nung coronavirus wara indang tensa meyipa repringshitsü atema senden ka ayonga menogo.

"Senden nung ketdangsürtemi Prime Minister dang vaccine agütsüba osang tejangja metetdaksü. Parnokisa arishi küm telemsa yur vaccine agütsüba den healthcare workers, frontline workers aser public nem vaccine agütsüba indang ashi" ta PMO sangdong ka nung metetdaksü.

"Tesüiba anogo trok tsüingda vaccine indang dose crore 3.77 agütsüogo aser iba ya Malaysia,

Saudi Arabia aser Canada linüktem nütsüing yongsük dang nungi teimba lir" ta PMO-isa metetdaksü.

PM Modi-i tan hopta tsüingda vaccine agüja aruba atema temolung asüba ashi aser maneni iba amai inyaka aotsü ayongzük, ta parnokisa ashi.

Senden nung PM Modi-i vaccine agütsüba maparen nung NGOs aser tanga loktitentetem shilem agidaksütsü atema ashi. Taküm January nungi India nung Covid-19 vaccine indang dose 31,50,45,926 tashi agütsüogo. Tesüiba ghonda 24 tsüingda dose 61,19,169 agütsüogo.

Aluyimertemi lungkak ait tenzüker ita 7 abensaogo

Ludhiana, June 26, 2021 (Agencies): Yaküm Parliament nung Farm laws asem agizükba anema aluyimertemi lungkak aittsü tenzüker tanü ita 7 abensaba tenüing nung Honibarnü Punjab nung aluyimer meyirjang aika adenshia Chandigarh-i apusogo.

Parnoki state Governor ajanga India Tir Ram Nath Kovind nem memorandum ka agütsütsü atema tetsüing agi Chandigarh-i aotsü apuso.

Tesüiba ita tenet tashi Delhi den arrtsü anasa lungkak aitba aluyimertem pusemba sayua

tanü aluyimertemi jajatsü tenzüker. Parnoki 'Save agriculture, Save democracy' ta ayimtena apuso.

Aluyimertem telok 32, BKU Ugrahan aser Kisan Mazdoor Sangrash Committee (KMSC) nungi züingsemtemi Chandigarh-i ao. Külen, Punjab kübok district 22 nung Deputy Commissioner (DC) office kima nung aluyimertemi lungkak aiter.

Honibarnü lungkak aitba ya jashi yonga timi shilem agitsüba atema lir aser iba jagi lanur aika medendaksür, ta aluyimer lennirtemi ashi.

Chief Secretary-i District Task Force tem den senden amen



Nagaland Chief Secretary, J Alam, IAS-i anir tongti ketdangsürtemi COVID War Room nungi District Task Force tem den video conferencing ajanga sensaksemba noksa ung angur. (Kohima 26, 2021)

Dimapur, June 26, 2021 (TYO): June 26, 2021 nü Nagaland Chief Secretary, J Alam, IAS-i anir tongti ketdangsürtemi COVID War Room nungi District Task Force tem den video conferencing ajanga sensaksemogo.

Iba mapang Chief Secretary Alam-i DTF ajak dang Testing, Vaccination, Rural Surveillance aser Lockdown atsülangtsüba indang osangtem metetpela liasü.

Paisa state ajungalen sample talila tendangtsü aser vaccine agütsüba maparen tuluba inyaktsü nenshia metetdaksü. Senden nungsa Deputy

Commissioner temi pei pei district nung tetsükdaksü ajuruba den parnok tebilembatem lemsatep aser Chief Secretary-i item onük temaba ketdangpurtem dangi abentsü nangzük.

J Alam-isa Deputy Commissioner tem dang District Head of Offices indang attendance repringtsü aser ketdangsür ajak pei mapa lemsakdaksü atema inyaktsü tetuyuba agütsü.

"Nagaland nung DTF ajaki COVID-19 azüoktsü atema mapa tajung inyaka aruba atema tenüingsang agütsür aser maneni ano meranga inyaktsü

ayongzük," ta CS Alam-isa metetdaksü.

Senden nung DGP Nagaland, T. J. Longkumer, IPS-ia Superintendent of Police ajak jeretpera alitsü aser mozü kitem anasa ozüing alema mapa meinyakdaksütsü atema tetuyuba agütsü. "Medical staff aser shirangertem kümzüka ayutsübaji kanga tongtipang lir" ta pai ashi.

DEF Longleng nung vaccine agiba 100% tongogo aser iba atema parnok nem kulikaket den Rs. 50,000 senpet agütsür, ta DGP Nagaland-isa ashi.

COVID-19 Nagaland: 91 dak putet; 106 taneptsü angu; 6 asü

Kohima, June 26, 2021 (TYO): Honibarnü Nagaland nung COVID-19 puteta alir nisung 106 taneptsü angu aser 91 dak putet.

"Tanü nisung 91 dak COVID-19 aliba putet. Parnokji Kohima nung 48, Dimapur nung 20, Mokokchung nung 9, Tuensang nung 6, Zunheboto nung 4, Peren nung 3 aser Phek nung 1 lir" ta Integrated Disease Surveillance Project atema State Nodal Officer, Dr. Nyanthung Kikon-i ashi.

"Maneni, tanü COVID-19 puteta alir nisung 106 taneptsü angu. Parnokji Dimapur nung 35, Mokokchung nung 31, Kohima nung 21, Peren nung 6, Phek nung 5, Mon nung 4, Tuensang nung 3 aser Longleng nung 1 lir" ta paisa ashi.

Tanü COVID-19 putetertem züingsema nisung ajak agi 24,850 kümogo aser taneptsü angur 22,178 lir.

Nagaland nung COVID-19 nungi taneptsü angurji 89.25% lir aser tang nisung 1,487 anepaludar, ta Dr Kikon-i ashi.

Honibarnü Dimapur nung COVID-19 puteta alir nisung pezü aser Mokokchung o Phek nung kaka asüba züingsema tasür

ajak agi 487 kümogo. Ajisüaka, nisung 14 bo tanga tashidak ajanga asü ta paisa metetdaksü.

Nagaland nung COVID-19 alitsü akok ta temolung melemi bilemba sample 2,21,528 tendangogo. RT-PCR ajanga 96,866, TrueNat ajanga 60,957 aser Rapid Antigen Test ajanga 63,705 tendang, ta Dr Kikon-isa metetdaksü.

Hokolbar tashi nung nisung 4,03,495 nem COVID-19 vaccine indang dose 4,60,623 agütsüogo, ta State Immunization Officer, Dr Ritu Thurr-ia metetdaksü.

Vaccine agirtemji frontline workers 60,071, healthcare workers 15,788, arishi küm 45 ser temapur 1,44,433 aser arishi küm 18 nungi 44 tsüingda alir 1,82,203 lir, ta paisa ashi.

"Vaccine agirtem rongnungi nisung 57,128-i dose anaprong agiogo. Parnokji frontline workers 28,698, healthcare workers 10,423, arishi küm 45 ser temapur 17,997 aser arishi küm 18 nungi 44 tsüingda alir nisung 10 lir" ta Dr Thurr-isa ashi.

MOPUNGAOLEN JUNGA MALIDAK NISUNG AIKA MADENSHITSÜLA:

Hokolbarnü Mon district jail nung nisung 37 dak putetbaji 'super-spreader' ka liasü, ta Health & Family Welfare Principal Director, Dr. Neikhrilie Khimiao-i ashi.

"Mopung aolen shitak maliser SARS COV 2 menatepbaji iba ajanga sayur. Ki telung nung mask anana agitsüla, nisung aika madenshitsuila aser mopung aolen shitak alitsüla" ta Dr Khimiao-isa ashi.

Tesüiba hopta ka tsüingda Tuensang, Phek, Wokha, Zunheboto, Peren aser Mon nung nisung aika dak COVID-19 putetogo aser teimtibaji Peren district nung liasü, ta paisa ashi.

Kohima, Mokokchung aser Peren nung hopta shia sample positivity rate 10% tema lir aser ibaji state ajunga indang 9% nungi teimba lir, ta Dr Khimiao-isa metetdaksü.


Tesüiba hopta ka tsüingda Nagaland nung Covid-19 puteta alir nisung 14 asü aser ibaji hopta 8 nung nisung tajemtiba asüba liasü.

2021 küm COVID-19 aliba puteter nisung teimbaji arishi küm 21-30 tsüingda alirtem liasü, ta Principal Director-isa ashi.

Covid-19 tashidak nokdangtsü atema senso shia teinyaktsü asem :



Tangar alidak teti teni
tebang nembanga mask
temerük agiang;



Tangar den tsüktepa
tenokdak aser temen;



Teti sapon agi
teka metsükang.

DMAF kübok Kohima Smart City Top 10 nung lir

Top Cities

	1st		4th Pune	9th Chennai
	2nd		5th Nagpur	10th Kohima
	3rd		6th Ahmedabad	10th Raipur
			7th Jabalpur	10th Thane
			8th New Town Kolkata	

Kohima, Aami/June 26 (TYO): Smart Cities 100 rongnung Kohima jenjang 10buba nung lir aser Data Maturity Assessment Framework 2.0 (DMAF) nung "Enabled" ta certify sütsüogo. Iba osang ya Ministry of Housing and Urban Affairs (MoHUA)-i, June 25 nü Smart City Mission, AMRUT aser PMAY (Urban) amenoker küm trok abensaba nüngtem nung sentong ka ayongzüka agiba mapang sangdonga liasü, ta Kohima Smart City Development Limited (KSCDL), Nagaland-i metetdaksü.

North East nung Smart City tem rongnung Kohima kija Top Ten-i iogo aser tanga yimti ana den kasa jenjang nung lir. Smart Cities Mission-i 2019 küm February ita yimti 100 nung tetsükdaksütem aliba tem bentetsü atema data bendentsü asoshi Data Smart Cities Strategy amenok.

Iba sentong takok ngua benoktsü atema Data Maturity Assessment Framework dena amenokogo, koba data infrastructure tem tashi itshitsü atema yimitem ajungmesotsü aser data dak sendakba nung

parnok nem teyari agütsüsi atema lir.

KSCDL-i ashiba agi, DMAF Cycle 2 ya tongshi (pillar) 5 dak amendaker asadangogo:

Policy: Data governance, empowerment, protection, collaboration aser innovation dak sendakba nung robust policy mechanisms yimti nung amenoka aliba indang.

Nisungtem: City data policiy, manage data governance, drive inter-departmental and inter-agency data exchange aser city data alliances yangertsü atema len sayutsü asoshi yimti nung ketdangsürtem aliba indang.

Inyakyim: Data bendentsü, amshitsü, achaayangtsü, security, privacy, empowerment, collaboration, aser innovation dak sendakba nung yimti inyakyim.

Technology: Digital platforms, sensors, IoT devices, data exchanges, big data aser artificial intelligence densema yimti nung information aser communications technology jenjang.

Outcomes: Data driven governance, talitsü tayongba akümba, shishilembatsü zübaba, longjemer inyakba aser yimti

nung innovation jenjang.

Iba Framework atema Kohima-i jenjang agibatem rongnung, draft City Data Policy renemba, tzü, mopung, Mobility, disaster amala sector tem nung Data analysis, State Department tem nung Data-Coordinator tem aser lokti tentet kar shimba amala densema lir, ta KSDCL-i ashi.

Process Pillar dak sendakba nung data tem timba department balala ket nung lir, anungji department temi Kohima Smart City den data lemsateptsü atema mulungsoa agizükba ya tenüngsang agütsüsi langa lir aser kanga pelar, metetdaksüogo.

Kohima yimti ya "Connected" (Top Certification level) data Smart city ka kümdaksütsü atema department balala aser nüburtemi maneni shilem tajung agütsü kanga nüngdaka lir.

Maneni tsüngsang mopung meleshiba dak sendakba nung renemshia ataba indang yimitemi asadanga iba sentong nung sayaogo aser Climate Smart Cities Assessment Framework 2.0 nung star 5 ngutetsü aliba nungi Kohima-i star 2 ngua liasü, ta department-i ashi.

Kohima DPDB senden June 29 nü amentsü

Dimapur, Aami/June 26 (TYO): District Planning Officer & Member Secretary DPDB, Kohima, Pudusul Luho-i sangdong ka ajanga District Planning & Development Board (DPDB) senden June 29 nü anepdang 10:00 ako nungi tenzüka DPDB indang

conference hall nung amentsü, ta Kohima district DPDB züngsem ajak nem metetdaksüogo.

Anungji iba senden nung tamakok maludaksüi züngsem ajak arua shilem tajung agütsü kasa sangdong ajanga metetdaksüogo.

Peren DC-i senden ayonger

Dimapur, Aami/June 26 (TYO): Peren dstrict nung COVID-19 tashidak menar tali akümba aser tashidak prokshia aoba azüoktsü atema jenjang tapet agütsü nüngdaka akümba apir Deputy Commissioner, Sentiwapang Aier-i, June 28 nü senden ka ayongzüko. Iba senden ya Deputy Commissioner, Peren Conference Hall nung 12:00 ako nungi tenzüka agütsü.

Executive Secretary/Secretary/President/tamangba yimsü balala tekolaktem ajak.

4. Peren District kübok tribal organisations President/General Secretary ajak.

5. Zeliangrong Students Union, Nagaland.

6. ZMO.

Iba dak sendakba nung züngsem ajak dang senden nung jangrabangra arua shilem agütsü metetdaksüogo. Maneni COVID-19 SOP dak ajemdaker lokti tentet ajak dang senden nung shilem agütsü atema züngsem kaka dang yoktsü mepeshia metetdaksüogo.

Senden nung adentsüpurtem:

1. COVID-19 District Task Force züngsemtem ajak.
2. District COVID-19 Vaccination Committee züngsemtem ajak.
3. Peren District kübok

164th Infantry TA (NAGA) & 5 AR-i teyari agütsü



164 Infantry TA (NAGA) aser 5 Assam Rifles-i Aoyimkum yimtsü nung tantsür tamburtem aser aahyangertem nem chiyongtsü lemtsüba noksa nung angur.



Dimapur District Disaster Management Authority (DDMA)-i Aoyimkum yimtsü nung anogoshia aahyangertem aser tenüngdakba purtem nem chiyongtsü agütsüba June 18, 2021 nü Aoyimkum Village Council-i lemtsüba noksa nung angur.

Dimapur, Aami/June 26 (TYO): 164th Infantry TA (NAGA) aser 5 Assam Rifles-i June 25 nü Aoyimkum, Panchayat Hall nung tantsür tambur aser anogoshia alirtem nem teyari tulu aahyanga chiyonga alirtem nem chiyongtsü (Dry rations) balala lema agütsüogo.

mapang pei mapa dak alia nüburtem tenzüksü nükjidong nung tasütait sepaitemi yimtak tantsür tamburtem aser anogoshia aahyanga chiyonga alirtem nem teyari tulu agütsüba atema yimtak ketdangsürtemi 164th Infantry TA (NAGA) aser 5 Assam Rifles dang kanga pelaba lemsatepogo.

COVID-19 pokteter state ajunga mokdang aliba

Pungro nung vaccine agütsü tenzüko

Dimapur, Aami/June 26 (TYO): Pungro Administration aser Medical team na longjemer June 26 nü Pungro jila nung vaccine agütsüba sentong ka ayongzüka agiogo.

Additional Deputy Commissioner, Pungro, Abhinav Shivam, IAS-i, social media nung olulu osang prokshiba aser osang taila prokshiba ajanga nüburtemi vaccine agütsü arendaker ta ashi. Anungji ken o mejangja

Maneni ADC-i, vaccine agütsüba mapang medical team aser yimtsü nung lenirtemi teyari tulu agütsüba atema parnok dang kanga pelaba lemsatepa liasü.

Sewa International-i Noklak nung medical osettem lemtsü



Dimapur, Aami/June 26 (TYO): Sewa International-i June 24 nü Noklak district kübok yimtsü 20 nem medical kits balala lema agütsüogo. Sewa International ya amenoker küm 24 jungogo. Iba lokti tentet ya non-profit organization ka lir, shirnoki nüburtem tenzüksü atema temulungertemi aniba social project tem ajungkettsü atema inyaksangshir.

Parnok nem Nagaland Angh office nungi teyari agütsü aser District Administration ajanga yimtak Hd.GB tem nem osettsütem lema agütsüogo.

Kasa mapang nung Noklak Deputy Commissioner-i, District nung teyari kanga nüngdaka aliba mapang Nagaland Angh aser temulungertemi teyari tulu agütsüba atema kanga pelaba

lemsatepa liasü.

District kübok kinük nung aliba teshimtet yimtsü nung kar nem agütsüba COVID management package nung oxymeters, glucometers, digital thermometers, handsanitizers, ply mask 3, N95 mask, glove, face shield, paracetamol & vitamin C+ Zinc tablets, back pack bags, PPEs aser health kits tem densema lir.

Manipur nung sen crore aika alang mozütem puogo: Biren Singh



Honibarnü 'International Day Against Drug Abuse and Illicit Trafficking' sentong ka agidang Manipur chief minister N Biren Singh-i mozü rongdokba angur. (Imphal, June 26)

Imphal, June 26, 2021 (Agencies): Manipur nung 'War on Drugs' campaign nung sen crore aika alangba mozütem puogo ya Honibarnü Manipur chief minister N Biren Singh-i metetdaksü.

Tanü Imphal nung 'International Day Against Drug Abuse and Illicit Trafficking'

indang sentong ka nung adendang CM Biren-i iba osang ashi.

Paisa sensotem dang ozüangi memelaba mozü achiba anema noktaksü ayongzük.

Iba sentong nung CM Biren-i mozütem magizüker ta sayua mi nung rongdok.

India nung ozüangi memelaba

mozü achir teimba aliba state tem rongnung Manipur dena lir.

Manipur sorkari 'War on Drugs' campaign tenzükba nung lokti tentettem, NGOs aser yimtsüng balala nung alirtemi sorkar den yariteper.

Yim balala nung alirtemi parnok telongtet nung aliba poppy plantations aika raksatsüogo.

Assam nung ali hectares 3,400 tashi sorkari meyipa agiogo

Guwahati, June 26, 2021 (Agencies): 2016 nungi 2021 tashi Assam nung Environment and Forest Department-i aren nung hectares 3,400 tema ali atsünga agirtem ket nungi meyipa agiogo.

2016-2020 mapang department-i forest lands, wildlife sanctuaries, national parks, aser tanga protected areas nungi ali meyipa agi. Iba mapang ozüangi memelaba kiojen 2,960 raksatsü aser nisung 194 apu.

April 2021 nungi June 23 tsünga ali hectares 915.05 tashi meyipa agiogo. Lower Assam Zone nung 185.55 hectare, Upper Assam Zone nung 2.5 hectare, Karbi Anglong West Division nung 615 hectare, Karbi Anglong East Division nung 50 hectare, Kokrajhar Haltugaon nung 40 hectare aser Orang National Park nung 22

hectare meyipa agi.

Environment & Forest Minister, Parimal Suklabaidya-i reserved forests aser tanga protected areas nung ali atsünga agirtem ket nungi ali meyipa agitsü atema alizüng yur mapa inyaka arur.

Civil aser police administrations teyari agia ali meyipa agir, ta Minister Suklabaidya-i ashi.

"Assam indang forest lands, wildlife sanctuaries, national parks, bio reserves aser tanga protected places nung ali atsünga agiba atema zero-tolerance policy ka tenzüktsü" ta paisa ashi.

Department-isa Minor Mineral Concession Areas nung aser mahals 49 nungi sand aser stone mahals indang revenue anendaktsütsü meranger, ta Minister Parimal Suklabaidya-isa metetdaksü.

Akhil Gogoi kidangi meyipa aru

Sivasagar, June 26, 2021 (Agencies): Honibarnü Sivasagar MLA aser Rajior Dal tanishir Akhil Gogoi kidangi aruogo.

Jorhat district kübok Mariani anasa Selenghat nung par kidangi meyipa arudang nisungtemi pa pelaa agizük.

NIA court-i Guwahati nung par kinunger aser tetsü Priyada Gogoi aser ano Selenghat nung kinungertem den ajuruteptsü atema Akhil nem ghonda 48 temelaba agütsü.

Akhil Gogoi ya December, 2019 nung Jorhat nung apu aser Dibrugarh nung Citizenship Amendment Act anema lungkak aidang ozüng alema mapa inyaktsü ajungmeso ta NIA-i UPPA kübok pa dak tai tongloktsü.

Taküm March ita pa tepuokdak nungi dang Sivasagar legislative Assembly menden nungi toktepa takok angu.

"Ni kütsü tepi nung anisüngzükünür aser pa den mapa endoknür" ta tanü Akhil-i ashi.

"Taruba mapang ni Sivasagar semdangtsü aser ozü constituency nung terenlok bener arutsü atema inyaktsü. Sivasagar nung tourism mapa inyaktsü aika lir kechiyong Ahom yimli indang nüngshilungtem lir" ta paisa metetdaksü.

"Assam nung yimten ketdangsubarenji Uttar Pradesh ama lir. Iba ya melenshitsuila aser asenoki Assam-i democracy meyipa bener arutsüla" ta Akhil-isa ashi.

Taoba Mariani MLA Rupjyoti Kurmi-i yimten tsütsü aibelen tulu ka inyakogo ta paisa aitsü.

"Rupjyoti ya küdi ama lir aser yamaji teti alitsü, saka pai tai inyakogo aser iba atema pai tatok meshitsü. Onoki pa madak takok angutsü aser pai nübertem ashioktsüba atema telangzüba

angutsü" ta Akhil Gogoi-isa metetdaksü.

"Ni sensaker kibong ka nungi lir aser kütsü ni aser kü adianutem anitetsü atema kanga meranga inyakogo. Nisung ajak janratema lidaktsütsü atema ni alizüng yua lir. Ni meranga inyaktsü aser onok timtemba ama tangar timtem majurudaktsütsü" ta paisa ashi.

"Ni MLA ka akümstübaji kodang mebilemi liasü. Tepuokdak nungi ni election nung takok angu aser ni MLA ka ama mebilemer. Saka kütsü tenüng nung ni ochimashi mesüra ashikülakba MLA ka masütsü nangzük. Nisung ajaki kü den ajuruteptetsü aser ni teti inyaka aruba ama nübertem asoshi ola adoktsü" ta Akhil-isa metetdaksü.

Tanü anüngdang 12.30 ako meta Akhil Gogoi par kidangi aru aser security personnel-i par ki telungi shinga meidaktsü.



Assam nung ita trok tain kinü tanur nungi tenzük arishi küm 14 tashi COVID19 virus ajanga timtemer. Tanurtemji teimba ka Red Districts ta ajaba Tezpur aser Nagaon district tem nungi lir. June 14 nungi tenzük anogo 12 tsünga Nagaon nung tanur 172 dak coronavirus aliba puteta liasü.

BJP-i Manipur aser Assam tирtem shim

Imphal/Guwahati, June 26, 2021 (Agencies): Honibarnü BJP-i Manipur unit nung president inyaktsü atema Sharda Devi shimogo.

"BJP national president JP Nadda-i nübertem shimogo aser parnoki joko mapa inyak tenzüktsü" ta party general secretary Arun Singh-i ashi.

Taoba ita Manipur unit president Saikhom Tikendra Singh COVID-19 ajanga asü aser Sharda Devi-i pa melenzüktsü. Sharda-i taoba mapang vice president inyaka liasü.

Manipur nung sangküm Assembly election agitsü.

Külen, BJP national president JP Nadda-isa Assam nung BJP president inyaktsü atema Rangia MLA aser taoba irrigation minister Bhabesh Kalita shimogo.

BJP national vice-president Baijayant Jay Panda-i Twitter

ajanga Bhabesh Kalita nem tenüngsang agütsü.

"Kalita ya lennir tejen ka lir aser tenüng tajung nguteta lir. Pa lenisüba kübok Assam nung party jenjang tajungba akümstü imlar" ta Panda-i ashi.

Bhabesh Kalita-i 2016 Assam Assembly election nung Rangia constituency nungi takok anguba sülen Sarbananda Sonowal-i aniba ministry nung Cabinet minister aküm.

Iba mapang pa Minister of state (independent charge) for irrigation aser MoS for education liasü.

Taküm Assembly election nunga Kalita-i kümsük tanabuba atema takok ngua liasü, saka Himanta Biswa Sarma-i aniba ministry nung pa maniok.

Bhabesh Kalita-i Ranjeet Kumar Dass nungi mapa melenzüktsü. Dass ya panchayat & rural development minister lir.



Meghalaya health minister AL Hek-i Assam chief minister Himanta Biswa Sarma dang state ana tsünga arrtsü ken o jembitsü atema mapa tenzüktsü ayongzükogo. Honibarnü Minister Hek-i Guwahati nung CM Sarma den ajuruteper aser idangji chief minister jenjang nung olemtep tenzüktsü mepishia liasü. (Guwahati, June 26)



TIR YIMYIM YIMOBILEM (EDITORIAL)

DIMAPUR AMUNGNÜ, AAMI (JUNE) 27, 2021

Asenoki Tsüngrem bushitsüla

Tsüngremi Nineveh nunger mesamadaktsünüba agi Yona yok ama, asenok tang Covid wara agi kangshiba ya tajungleni bilemdangra, Tsüngremi asenok mesamadaktsünüba agi ainker agi Covid kümer arudaktsü amai asenoki angatetsüla. Aji oda, tang ama tashidak wara tamajung agi asenok tonga marudang, asenok libaliro aser jakla yimyatem to bilemdangra, atangji asenok kata manüng alijak nungi samatsü langa lir, saka asenok samatsütsü asoshi masü saka mesamadaktsünüba agi asenok dangi Tsüngremi iba tashidak ya yok südi ta angateter. Ashi, tanü asenok libaliro jenjang reprangdangra, alemli Hosea ainker nunger mapang Israel nungertemi benshiba temenen mapatem ajak asenoki benshidagi. Aji oda, tanü asenok temenen nung aliba tia jenjang ya Hosea tapu 4 nung shia aliba ama, Tsüngremi asenok tashitemetet kümdaktsü saka iba tashitemetetji asenoki ajemalua Tsüngrem nungi aru ta angateta ochishia nungdakba purtem atema amshi masü, saka asenoki iba tashitemetet jagi alaker ama maginü aküm aser iba tashitemetet jagi mapa tajung inyaktsü melen ochimashi aser japujari mapa inyaktsü tenzük. Tsüngremi asenok meimba agi tangar kintem dang nungibo asenok nütsüng nübosa teimba kümdaktsü, saka asenok nütsüng teimba züinli, tetsürtema aser teburtema temenen mapatemang tali inyakli ta asenoki Tsüngrem jashidaktsü aser alima kanga mejungi menentsü. Iba jagi Hosea tapu 4 nungjisa ashi ama, tanübo asenok sentsüwangshi aser asenok aküm to agi maksüang kumogo. Aser shitakba asenoki Tsüngrem o bushitsü melen rongsen aser alima shi azü jangratem dang bushiba agi, Tsüngremi Pa tenzükertem daka mesaloki kumogo. Aji oda, nübortem o putirtem na prongla toktepa majung aküm nungji, Tsüngrem tsüngdang asenok temerenshi angutsü langa lir. Iba jagiang Hosea tapu 4 nung yasa Tsüngremi Pa tenzükertem danga parnokji Pa tenzüktsü memelatsü ta ashiba angur. Aji oda, lialia asenok nübortem nüktapangta aser japujari mapatem nung Tsüngrem ama mali ama, asenok sülepnütsü seplepba agi, asenoki asenok nütsüng renloktsü amai bilemer saka asenok tali seplepli nütsüng tajemba kumli ta akümba asenoki tanü ajangshidagi. Ibaji kodang asenoki Hosea tapu 4 nungji züngdandir, iba kasa o ji shia angutsü. Iba amaji asenok mejungi liaka, Tsüngremibo asenok mesamadaktsüner, kechiyong David Chubai ashi ama, asenok temang aser tanüla tekümtet mangu samaba nungji Tsüngrem kecha tajangzük mangur. Paibo asenok kata mesamadaktsüner. Iba jagi 2 Putipuyang tapu 15 nung ashir, kodang asenoki Tsüngrem bushidir, asenoki Pa angur. Ajisüaka, asenoki Pa sendokra, Paia asenok sendoktsü. Paibo asenok akhi ama tashitemetet kümdaktsüner, yimjung nung akümketa lidaktsüner, saka asenok azü pei saksü dangi meyipba ama aser ak tzü chigur ano lishi nungang jangratatempa melangshia kazü ama, asenoki asen sünütsü süa, inyaknütsü inyaka aser chiajemnütsü jema temenen nungang alitsü jangrara, Yerimia 22 nung ashi ama asen lima azüngmeyaka akümtsü. Tsüngremibo asenok den linür saka asenoki Pa asenok den alitsüsa mapang magütsür. Aji oda, asenoki komaka Tsüngrem asoshi yongyar aser Pa tadenba aginür, patetkaji aser papigji Tsüngremi asen bushia arutsü ta Laishiba jagi ashir. Tsüngremji asen kilir masü saka kibur, anungji Pai asenok bushitsüba masü asenoki Pa bushitsüla, Pai asenok tenzüktsüba masü saka asenoki Pa tenzüktsüla. Ajisüaka, Isaia 59 nungbo ashir, asenoki Tsüngremi yamai meimdaka, tashi mangai anosa temenen nung jajara, mapang ka arutsü, idangjibo asenoki Pa bushiyonga mangutsü. Iba ama taochi suiteмба mapang ka agi asenok memenep dang, Yakob tapu 4 nung ashi ama, asenok ajemaludi, asenoki tai temenen nangzükdi aser Tsüngrem anasai odi. Asenok menen agi asenok samatsüba tia nung aliba memeteti, asenok yamai mezümekümtepa asenokbo kodanga meshirangtsü aser mekangshitsü aser mesamatsü ama bilema melii, asenok temenen nangzükba jepdi, mangyimdi aser taidok meshidi. Atangji, asenok aikati Tsüngrembo tetshir saka Tsüngremi mulungba nung malir. Tsüngrem o bo jembir saka Laishibabo mebushir, Tsüngrem dak nungi ajak imlar saka sarasadembo masür. Itemji ajungbena samatsüba purtem lir. Tang Covid mapang ya asenok asoshi Tsüngrem bushitsü mapang tajung lir, kechiyong asenok tejenokdak maka kumogo. Asenokbo Tsüngrem bushidi. Asenoki bushira angutsü ta Tsüngrem tenangzükba taochi o Mathi 7:7 nung shia aliba to mamali aser ano khen jungjunga amangshidi.

OLEMSABANG

ABAM OFFICE NUNG DEPARTMENT PALALA NUNG SECRETARIES (HEAD OF DEPTS.) SHIMBA YIMYA YA YAMAI ANG INYAK NUNG KODA TA KÜ TEBILEMBA KAR

~ S. Medem Kichu, Lerie Colony, Kohima

Angazükba agi Secretaries, iba menden nung amentsü atema küm 5 or 10 term nung dang shimmer ta angazük, saka nibo ashir, iba post nung amentsüpurtümba permanent basis nung shimtsüla ta bilümer. Iba office ya ABAM Administrative Headquarter office lir, saka yamala office nunga Deptt. Shia Head of Department tenure post nung dang appoint süra, mapaji kodanga tebelümba ama meinyaktetsü. Küm 5 or 10 tsüngda nungji mapaji koma inyaka aotsü angazükli term tümadok nung mapa toktsür oadoldi, ano tasen ang kar aruli ta dang mapang shia melenteptsü yamala working system amshiba officejibo govt.-a süang private organization office-a süang regular süa officeji anüktsü responsible officer ka dang mali nungji kodanga shingaia mapaji temulung süa aser takok ngua minyaktetsü.

Aji oda parnokji regular basis nunga süang mesüra tenure post nung dang süang, parnokji joko arishi küm nung küm 60 tema nung alirtüm shirnok lemanng ajak nung shisatsü aser temetetbaji peria angazüka lir parnokji dang shimtsüla.

Pa/laji pei-i inyakba mapaji English aser Ao o anaprongla nung kecha tarendakba makai telok dang shitetba tenzük asütsüla.

Ajak rongnung pa or laji Tsüngrem temeshi lanüla agi asüngba tenzük ka asütsüla, kechiaser office inyakyim agi sayuba agi Executive Secretary jibo office nung figure head ka amai dang asünung Mongdang mapa tongtipangbo itüm tenzükertüm agi dang inyaker.

Pa/Laji shiba südir süang, parnokji Impur office nungi dang retire asütsü pur dang shim nung tajungba. Saka tanü asüngbo tanupor/ tanutsür-a kar mapang mapang nungbo shimshia atar ta angazük. Yamaji ka ali nungbo parnokji küm agi term tümpanga dok nung mapa nung katitsüsa akümtsü, aser tesülen ano tanaben mapa tasen bushia aotsüsa akümtsü, ibaji kibong ka atema kanga dang timtüm tulu lir.

Impur office nung inyakdangbo tematiba menden nung mener inyak, saka term tümer ano tanaben tasen kümshia yimtsüng level tashi nung mapa bushia aobaji majung. Nisung karbo yamala tia jagi aiba taoba mapang nunga ngugo.

Tang tienyadok pur rongnung nisung kar iba tia jagi aitsüsaka lira nibo ashir parnokji service extension ang agütsür parnok nüm dang inyakdakjang, kechiaser tasen shimbadang nungibo tejinpur nüm dang inyakdaktsüba Mongdang atema kanga dang tajangzük lir.

ABAM Administrative HQR Office (Impur) nung inyakertüm, Executive secretary nungi tenzük department shia nung Secretarytüm tenure post nung dang shimba ajanga pa nüm nungloktsüba Deptt. mapaji temulung süa minyakteter ta ajaki bilümer. Ashiko karbo pai tunzüka toktsüba project mapaji matümdang jashisita officeji toktsür oya-a alitsü südi. Itüm rongnung ni tatishitsü kar shidi.

Nagalima khrista osang tajung mezüng aruba kümji 22/12/1872, saka iba nunga tang tashi tejangja o bendang, magitetba, ABAM nung inyakertüm ajak superannuationji küm 60 nung fix süa toktsü, saka tang tashi local Arogo ajak nung uniform süa implement mesütetba, Laishiba mezüng translation (1964) mapang nung aibülana inyakba karbo ano tang tashi memelenshi-i dang angur. Ken kakütbo taoba mapang küm eshika ajaki asateper ang 2016-17 Edition ya tera junga yanglutetogo. Itüm ajak ya ABAM administrative HQR office nung permanent administrative officer ka maliba ajanga ta asen ajaki meteter.

Ano ni iba ya lephshia dang ashir, Secretarytüm shimba yimya yabo serviceji regular basis nung dang shim nung ABAM atema kanga agi tajungba asütsü ta bilümer. Yamaji sürabangla, Executive Secretary tasen kodang appoint asütsüsa kümdir, tang field nungi mesüra institution kar nung bener arudang nungibo parnok rongnungi dang seniority basis nung promotion agütsütsü. Yamaji inyaktet nungbo Executive Secretaryjia tanga field nungi aruba dang nungibo Secretary nungi promotion ngur inyakba jagi Mongdang atema khenyongi tajungba inyaktetsü.

Iba proposal ya junger ta ABAM-i bilümba yamai yanglushi nung Mongdang atema kanga dang tajung asütsü ta tebilümba kar lemsateper.

- Yimozülur dangi -

Tir Yimyim adok June 25, 2021 yimobilem (editorial) kanga temoatsü ngua züngogo. Smartphone aruba den ano Covid 19 ajanga kakat azünger aika joko reading habit to samaaogo. Talisa, students kakat azüngba yimya melira koda züngteta aotsü ta kanga shisabulua bilemer. Lockdown süaka mapang tataktet senzügenpongtsü melaa lirji kakat azüngtsü jangrar atemabo lemanng karbo lir. Arogo ajak pei akokba nung library maintain süa lir, asen anasa aliba Educational institution nunga library lir, ano book stalls aser privatei lapokba library tema alitsü, anungji tejangrar atemabo lemanng ajak takoktsü lir. Tsürabur aser teachers temi danga extra mile agia ajungshitepdi.

- Asongla Pongen

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Odisha kübok yim 3 nungi Khristan 57 arem nung jenoka lir



Odisha nung Rayagada District kübok yim asem nungi Khristan tem mindokba sülen Khristan tem arem nung jenoka aliba noksa nung angur. Tang arem nung Khristan 57 jenoka lir.

New Delhi, June 26 (Agencies):

Odisha nung aliba yimtsüng asem nung akhi tribal yimsü amangertemi Khristan 50 dak tema mindokba sülen tang parnok arem nung jenoka lir, ta osang ka ajanga metetdaksü.

Tang arem nung jenoka aliba Khristan kibong 13 ji Rayagada District nungi lir. Parnok arem nung tejenokdak ki mali aser chiyungtsü den tzü agi timtemdar.

Osangbener den jembidang Sikarpai yimdak nungi Nori Kanjaka-i, "Tang tzüngluruwa mongpu tenzükogo, anungji onok tashidak balala agi shirangtsü tsübur," ta metetdaksü.

June 7 nü Kotlanga yimdak Khristan amokmerenba sülen Khristan kibong pongu aremi jena ao. May 23 nüa Sikarpai yimdak akhi yimsü amangertemi Khristan kibong trok meyong ki raksatsüba den Khristan dak azükba sülen yimdak nung mindoka liasü.

Kotlanga yimdak Khristan kibong pongu dak azük aser ki asütsü memelai liasü, ibayongji June 7, 2021 aonung parnoki yim toktsür aremi jena aoba sülen Sikarpai nungi Khristanatem jenoka aliba kasa tesem nung jenok.

Yim anasa aliba tanga yimtem nunga yimdaklirtemi Khristanem mindoker, ta Kanjaka-i ashi.

"Onok yimdak nungi mindokba osang prokba sülen tanga yimtsüngtemia Khristanem mindoker aser Khristanem dak azüker," ta Kanjaka-i metetdaksü.

Chichinga yimdak nunga Khristan kibong ana mindokba sülen arem nung jenoka lir. Tang arem nungji yim asem nungjagi Khristan 57 jenoka lir, ta paisa metetdaksü.

Sikarpai, Kotlanga aser Chichinga yimtem nung dang masü saka kasa district kübok Siripai, Kona aser Tongapai yimtsüngtem nunga Khristanatem anema inyaker, ta area pastor

Upajukta Singh-i metetdaksü. Police nem item osang metetdaksü yonga Khristanem maneni reshikangshir, aser Khristanem kümzüksü atema ketdangsertemi kecha meinyaker, ta Khristan lenirtemi metetdaksü.

"May 10 aser March 15 anogotem nunga Khristanemi Singhpur police station nung ken o benoka liasü, saka yim asemprongla nungji yimdaklirtemi maneni Khristanatem anema inyaker," ta Pastor Singh-i metetdaksü. Khristanemisa block aser district administrations nem item osang metetdakja liasü saka ketdangsertemi Khristanem dang Khristan yimsü tokjang, ta dang ashir.

Khristanemi ashiba agi, June 22, 2021 nü police officer in charge aser sub-collector nati arem nung jenoka aliba Khristanem semdang.

"Parnoki onok dang yimdaki tanaben meyipa oa liang aser akhi yimsü agizükang ta ashi," ta Rupa Kanjaka-i metetdaksü.

Khristan lenir aser Odisha Pastors Association nung züngsem, Pastor Prakash Bhatra-i, yaküm November ita nungi tenzüka yimtsüngtem nung Khristanem anema inyaker. Chiching yimdak mezüng Khristanem mindoka liasü, ta metetdaksü.

Sikarpai yimdak Hindu nungertemi Khristan ki ka nung kiyimba sentong nokdanga liasü aser yimdak tzübo nung Khristanem nem tzü metadaksü.

June 8, 2021 nü Sikarpai yimdak Khristanem ki raksatsüba sülen yimdak nungi mindok aser June 10 nü osangbenertem den jembidang Cuttack-Bhubaneswar Arogo nung putir Purushottam Nayak-i, "K h r i s t a n t e m i Kalyansingpur police station nung ken o ka benokogo aser iba tatalokba

bushisüngdang tenzükogo. Iba yimdakji Hindu nung kibong 32 aser Khristan kibong 8 liasü," ta metetdakja liasü.

Pastor Singh-i ashiba agi, Sikapai yimdak Khristanem alibaji Hindu nungertemi kanga maginer aser Khristanem kanga azükaruba agi Hindu nungertemi nuk-meremer. Pastor Singh-isa, "Tesüiba küm 14 tashi iba tesem nung Khristanem amokmeren yonga Khristanemi pei tamang jenjang nung akanga nokdaker," ta ashi.

Arem nung jenoka alirtem tenung ajak nung Khristan lenirtemi director general of police, collector aser chief secretary densema tongti ketdangsertem aika dangi shidi züluogo.

Osangbener den jembidang Attorney, Samuel Tand-i, CPC kübok Arrla 107 nung ajemdaker yimjung yanglutsü asoshi executive magistrate-i yimdaklirtem aser Khristanem naprongla senden kati jaoka liasü, ta metetdaksü.

Khristan 10 aser yimdaklir trok anema ken o ka benok, anungji parnoki yimjung tezüngzüktep agitsü atema executive magistrate-i jaok.

Magistrate-i jaokba ama June 17 nü Khristanembp aru saka yimdaklirtem maru, anungji yimdaklirtem dang arung ta tanaben tuyuogo aser nungdakra Khristanema tanaben jaoktsü, ta paisa metetdaksü.

Tandi-i ashiba agi, Khristanemji tawa Khristan yimsü agizükertem masü saka küm 14 tejaklen Khristan yimsü agizükertem lir.

Tandi-i, "Parnoki [yimdaklirtem] Khristanem sarasadembaji maginer, süra kechiba tamalenbo parnoki Khristanem anema ola madok? Kechiba tang ang Khristanem sarasademba anema parnoki nokdaker. Iba ya nisung kari yimdaklirtem ajungshiba ajanga lir," ta metetdaksü.

ANO GO ABEN TSÜNGREM DEN

NE KOLAK TEJAKREP

"Iba lungma nung shiba tsükdir pa anüka raksatsü;saka shiba dak ibai tsükdir, iba jagi pa auyi küma menüngsatsü" (Mt. 21:44).

Lungji Yisu. Pa temetsüdaksü lung ka liasü, aser lung nungji metsüdaker (Rom 9:33; Isa. 8:14). Yangi tangazüksü lesson tulu agütsür: Tsüngrem anema kodanga teinyak!

Paul yimsü nung tejangra tulu aliba ngasangatem aser asüküm nisung ka liasü. Pa Kibubai atsüzük, aser tenük pokdaksü aser ochiba sayutsü pa dang sayu: "Aso anema metsütsü pa asoshi tasak liasü" (T.Mapa 9:5). Paul Professor Gamaliel kübok tangazüker ka süaka, pai iba ochiba timi angatetta mali asü. Kechiaser Gamaliel asoshi iba ama Teratatsü tia nung pa leniba nukjidongji: "...Saka ibaji Tsüngrem nungi süra, nenoki parnok samadaksütsü makoktsü, aser nenok Tsüngrem anema Rarartem ta nenoki angatetsü" (T.M. 5:34,38,39).

Tanü Tsüngremi alima ajunga nung sayutsüngitsü asoshi Khristan mapa tenzükba aika adokdaksüogo. Kar kijai, kibong telungjem aser kar tentet ka kümer inyaker. Asen lima teraksa lima nung onok mapa tajungba, tanela nung inyaker ta tokteper! Asenoki iba tangatetba memelenshira asenoki ajak dak tai kenshia bushitsü. Asenok dak aliba anak dang nungi tangar dak aliba anakji tuluba angutsü! Khrista kangkii asenok dak mapa meinyakdaksü tashi iba tangatetba memelenshitetsü. Pei dak aliba tashi mait mangatet tashi rongsen, mapang aser nübu indokba kisung jagi Khristan tenzükba mapa nung takok mangutsü.

Khristan minister aser tenzükba mapa nung shinga tabensaba mali. Ajak dak tashi mait aser tashi lir. Asenoki tangar meraksadaksüi yanglutsütsüla. Tsüngremji Lung ka lir! Ni iba nung metsüksüla aser kü kolak mejakreptsüla. Adianu meimtepaji Tsüngremer metsü- anungji asenok o nung aser mapa nung meimtepdi.

Kibuba Yisu, Nai onok dang meimba ama onok rongnung meimtepa Khristan tenzükba mapa tashi ita inyaksü yariang. Amen.

Niger State nung kiralongrartemi doctor ka densema Khristan 18 tepset

June 26, 2021: June 17, 2021 nü Niger state nung Fulani kiralongrartemi hospital ka nungi Khristan doctor, Precious Emeka Chinedu puer aoba sülen khasetba densema tan ita kija nung Niger state nung Khristan 18 tashi tepsetogo.

Osangbener den jembidang Precious Emeka Chinedu'er medemer, Baridueh Badon-i, "Pa tepsetertemji Fulani telok nungi lir. Parnok hospital-i aruba sülen pa asüngdang, pa indang sen agi aser pa puer aoba sülen khaset," ta metetdaksü.

"Nisung ajaki pa kanga meima liasü, pa menürema dang liasü aser mapa nung kanga temerang liasü. Pai nisung jenti kümzükba ajanga pa inyakba hospital jagi shiranger aika arur. Pai timtemertem ajak yaria aruogo," ta Badon-isa ashi.

Tan ita kija nung Niger state nung doctor densema Khristan 18 tepsetogo.

June 13 nüa Jos South County nung Fulani teloki amakba mapang nung Khristan 14 tepseta liasü aser nisung tenet yiru.

June 12 nüa Fulani teloki Bassa county nung Khristan ana tepset. Kasa anogo nungjisa Dong, Jos North County nung Khristan aluyimer ka khaset.

Osangbener den jembidang iba area nungji alir kati, "Dong

yimdak Khristanem lendong nung lir. Bulus-i par kibong atema meranga inyaka liasü. Onok yamai kobika alitsü," ta ashi.

American Center for Law and Justice (ACLJ) nung senoir counsel, Mike Popeo-i, "2021 küm tang tashi nung Nigeria nung Khristan 1500 shi tepsetogo. Nigeria sorkaribo, iba ya yimsü tsüngda rara ajanga masü saka kiset shiruru metsürtem aser aluyimertem tsüngda rara ajanga lir ta dang ashir," ta metetdaksü.

Taküm küm tenzükter mezüngbuba ita pezü (January-April) nung Jihadists kiralongrartemi Nigeria nung Khristan 1,470 tepseta liasü aser tangbo 1,500 jungogo.

Meimchir temeden atema inyakba telok Intersociety Rule of Law-i sangdong ka ajanga, "Intersociety-i hopta ana tsüngda tang research tasentiba ya agia liasü, aser iba mapang nung linük (Nigeria) nung Khristanem

reshikangshiba tesem ajak asadanga liasü. Nigeria nung taküm January ita nungi April ita tashi nung tekümzükter maliba Khristanem 1,470 tashi tepsetogo; iba nungji Jihadist Fulani teloki Khristan 800 dak tema tepsetba densema lir," ta metetdakja liasü.

OLONG PAITEP # 5857

1						2				3
								4		
5		6				7				
8										9
								10		
				11		12				
		13								
14						15				
			16							

TIPILEN		LANGTSÜNGLEN	
1. O jembitsü tashi	- 8	1. Tepok telung nung shilem ka	- 7
5. Süngjang tapu ka	- 5	2. Tamajung aküm	- 5
7. Tekanük nung enokba	- 5	3. Chi den külemi achiba	- 3
8. Teka amtep	- 5	4. Meimchir alimai aruba	- 3
12. Tzüc asendak	- 5	6. Laishiba nung ayong ka	- 4
14. Tsünpang tema aliba	- 5	9. Tarutsü nükla	- 7
15. Ken atenba yimya	- 5	10. Tamendakdak/Nükjidong	- 4
16. Asangur	- 8	11. Tenük-telen mejungi aküm	- 5
		13. Terok nungi adokba	- 3
		14. Meimchir telemsa	- 3

OLONG PAITEP # 5856 TELANGZÜBA

TIPILEN :		LANGTSÜNGLEN :	
1. Taa, 3. Teküm, 6. Albelen, 7. Aut,		1. Tai, 2. Asensor, 3. Tanü, 4. Kua,	
9. Ajizük, 10. Ojala, 11. Semer,		5. Mitsüksü, 6. Azübenshi, 8. Lah,	
13. Sen, 15. Kiochtsü, 17. Itsük, 18. Kar.		9. Jangkok, 12. Akok, 14. Nashi,	
		16. Sür.	

KOMA SÜLA TELANGZÜBA

Q. Food & Civil Supply department nungi Relief jang ya magütsü anen nunga koma süla ?

Food N civil suppply nungi jang ya magütsüi anenadok nungbo sensakertem aika timtem ajurutsü aser takartema aika ak metsüba nung timtem ajurutsü. Kecha profit maliar ta sür memetsüi anenadoktsü kechiba süra sensakerbo ita ka nung jang kgs 5 dang angur saka tularitem takartem aikati jang bag bag (bosta bosta) agizüka bener aoba angur.

- TL chumu

Relief Jang ya asen state nungi tang agütsür asünungbo yakta anener lila saka central nungi agütsürji manentsü amai bilemer saka ano iba den ya k oil dal chana etc lir itemjia agütsüdahtsner.

- ns jr cmd

India Governmenti Asenok Nagaland nem BPL jang agütsüba ya asenok State ya sensaker statetem rongnung züngoka aliba agi agütsürba dang anungji asenok kibong ajaki Iba jang ya ajaki pelashishia agizüka agitsüla. Saka Tular aser Takartemi parnok shareji magi Anogoshia ayanger alir aser workcharge nung inyaktertem nem yimli sayua agütsü nungbo jungla ta shidanger

- SMS. M k G.

Food & Civil supply department nungi Relief jang ya magütsü anen nunga sensaker tembo kanga okrongtsü ako, saka tashishirbosa malitsüji, karbo kanga melemküttsü atiiiiii!

-WhaysApp

AO OSHI ANGAZÜKDAK:
TANÜ ANGAZÜKTSÜBA OJANG



Kati
(pro) tesem mesüra nisung ka indang ashiba (someone, somebody)
* Onok rongnung **kati** azü tenla agütsü.

Kati
(v) mali kümtsü (cancel, neutralize)
* Government-i mapai maor ajak tenüng kati.
Tangmo agi aon nung miim **kati**.

NAI-A YA METETTER MA?

West Bengal indang West Midnapore district nungi arishi küm asem tetsür tanur kati Bengali, English aser Hindi oshi nung sangro (poem) 50 tashi mereprangi züngtetba ajanga ostü yangluogo. Aratrika Ghosh-i sangro balala züngtetba den külemi, lai Rabindra Sangeet, tetsü-tebo ken, tekülem ken aser film indang ken 20 tashi tenteter. Aratrika-i item sangro tem zünga aser ken balala atenba osang angazüka India Book of Records (IBR) ajanga la agizük aser iba temaitsü sayua tawa la nem kulikaket ka agütsüogo. May 15 nü IBR ajanga Aratrika agizükba osang jangjatsü aser June 19 nü ktdangsür kar lar kidangi tsüngdong arua la nem certificate aser award agütsü. Iba sempet nung India Book of Records nungi agütsüba gold medal, pen ka aser IBR indang logo aketba sticker kar dena lir.

TANÜBO NAI LANGZÜANG

Q. Linük kobai 2020 küm indang Annual Bank Statistics temaba jenjang tongtet?

A.UK B.Norway C.Sweden D.Pakistan

===== (Taruba adok nung onoki langzüksü)

YASHI ADOK TELANGZÜBA : 43rd

SUDOKU # 5898 TELANGZUBA # 58987

					6	7			3	8	1	4	2	7	9	5	6
1	2			8			4	5	7	4	6	8	9	5	3	2	1
4	7			3				9	5	9	2	1	6	3	7	4	8
7	8	9	1	2	3				1	7	9	6	5	8	4	3	2
3		2		6	5	1	9	7	4	2	3	9	7	1	6	8	5
		1		9	4	8	3	2	6	5	8	3	4	2	1	9	7
5						9	7		2	3	4	7	8	6	5	1	9
	1	7			8	4			8	1	7	5	3	9	2	6	4
		8		7		3			9	6	5	2	1	4	8	7	3

OJANG LUTEP # 5442

DAKONG :

APOZÜANG :

BITENSHSÜ :

ZÜKTENDIR :

EASN :

KDA :

NGUNI :

HIOC :

LPIAA :

DOKOER :

OJANG LUTEP TELANGZÜBA # 5440

KATI KHEN KOKLI ANO KATI KHEN KOKLI TA MELENTEPA AKOK

TAN HOPTA ATEMA - KOMA SÜLA ?

Q. Impur Mission Hospital ya ABAM-i lenmang bushitepa Community Health Centre jenjang tashi danga tua lapoktsü lenmang bushitep nung koma süla ?

Aluyimertemi ozüng 3 anema longkak aitba sülen ita 7 jungogo



June 26, 2021 nü Amritsar nung aliba Golden Gate nung aluyimertemi aluyimba ozüng tasen asem anema yimyim ayima longkak aitba noksa nung angur. Aluyimertemi longkak ait tenzüker ita 7 ajungba anogo nung 'Save Agriculture, Save Democracy' Anogo among.

New Delhi, June 26 (Agencies): Yaküm November 26 nungi tenzüka state balala nungi aluyimertem Delhi arrtsülen adenshir aluyimba ozüng tasen asem anema longkak ait tenzüker tanü (June 26) ita tenet ajungba anogo nung aluyimertemi linük tesem ajaklen longkak aitba sülen state balala nung Angh tem nem temepishiba shidi agütsü.

Punjab nungbo Chandigarh nung longkak aiter aluyimertemi police barricades raksatsür Angh ki tonga aoba nokdangtsü atema police-i tziü khaloktsü.

Anasa aliba Panchkula (Haryana) nungi aluyimertem Chandigarh telungi aitsü merang saka police-i nokdanga liasü. Panchkula nung Haryana unit Bharatiya Kisan Union (BKU) lenir, Gurnam Singh Charuni-i

aluyimertem dang Chandigarh telungi maitsü mepishia liasü. Aluyimertem tentet balalai akümba- Samyukt Kisan Morcha (SKM)-i linük nung taoba Ato kilonser Indira Gandhi-i Emergency sangdongba sülen küm 47 ajungba anogomong (June 26) nung 'Save Agriculture, Save Democracy day' ayongzüka liasü.

Tamalen SKM-i, aluyimertemi longkak ait tenzüka sülen ita tenet ajungba anogo nung state balala nung Angh tem aser Union territories nung Lieutenant Governors ajanga linük Tir nem temepishiba shidi agütsütsü, ta metetdakja liasü.

Honibarnep osangbenertem den jembidang Haryana women's unit, BKU Tir, Suman

Huda-i, "Chandigarh telungi aiba nokdangtsü atema tenokdangba yua aliba tesem anasa onoki mener longkak aiter. Panchkula nung electricity board office anasa onoki nikongdang 5:00 ako tashi longkak aittsü," ta metetdakja liasü.

Aluyimertem unions-i Centre sorkar dang aluyimba ozüng tasen asem den Electricity (Amendment) Bill 2020 agientsü akhanger.

Honibarnü Kolkata, Delhi aser Bengaluru densema yimti aika nung aluyimertemi longkak sashia aitogo. Ghazipur nungbo longkak aitba tesem nung BKU lenir aser otongdar, Rakesh Tikait leniba nung tractor rally agi, ajisüaka SKM-i lemtetba ama parnoki Delhi telungibo mai.

Priyanka Gandhi-i July ita nung Mission UP tenzüksü

Lucknow, June 26 (Agencies): Sangküm küm tetenzüklen Uttar Pradesh nung assembly election agitsü lia Congress general secretary, Priyanka Gandhi Vadra-i taruba Uttar Pradesh election atema July ita nungi Mission UP tenzüksü aser July mezüngnü nungi la mapang timbaka state yimtiba, Lucknow nung amongtsü.

Congress general secretary aser Uttar Pradesh Congress unit in-charge, Priyanka Gandhi Vadra July ita nungi tenzüka Lucknow nung amongtsü.

Osangbener den jembidang Uttar Pradesh Congress tatong Tir, Virendra Chaudhary-i, "Party lenir (asür Sheila) Kaul'er ki

yanglushiba sülen ita trok jungogo. Iba kidangji la (Priyanka) alitsü," ta metetdaksü.

"La [Priyanka Gandhi] arutsü, anungji la leniba kübok Uttar Pradesh nung terenlok alitsü," ta UP Congress Tir, Ajay Kumar Lallu-i metetdaksü.

Jawaharlal Nehru'er adianu kinüngtsü, Sheila Kaul ya 2015 küm asü. La ya taoba mapang union minister inyakba dang masü saka Delhi nunga Chief Minister inyakogo. Lucknow nung lar ki ya Uttar Pradesh Congress Committee headquarters nungi kilometer 3 pilar lir.

2019 küm Lok Sabha election jakdang Priyanka Gandhi ya

anüdoklen UP nung Congress general secretary in-charge shima liasü.

Taruba Uttar Pradesh assembly election atema Priyanka Gandhi-i takok angutsüpur candidate tem bushi tenzükgogo. 'Zimmedar Kaun' campaign nung ajemdaker lai coronavirus wara junga maziüoktetba atema Centre aser UP naprongla BJP sorkar aija arudar.

Tawa Priyanka-i phone ajanga district 75 prongla nung party Tir tem dang election nung takok angutsüpur candidate pongu-ngu shimang, ta tuyua liasü.

Osang angazükba agi, tang tashi UP Congress unit-i candidate 50 bo shimogo.



June 26, 2021 nü Mumbai nung taoba mapang Maharashtra nung Cabinet Minister, Anil Deshmukh indang personal assistant, Kundan Shinde senotsü ochimashi ken o dak sendakba nung court kati anir aoba noksa nung angur.

Jammu & Kashmir nem state jenjang agütsütsüla: Omar Abdullah

New Delhi, June 26 (Agencies): Taoba mapang Jammu & Kashmir nung Chief Minister aser National Conference tatong Tir, Omar Abdullah-i, Jammu & Kashmir nem state jenjang agütsüba sülen ang elections agitsüla, ta ashi.

Jammu & Kashmir nung delimitation tembangba aser election agiba sülen ang state jenjang agütsübaji National Conference-i magizüktettsü, ta paisa ashi.

Pai ashiba agi, June 24, 2021 nü New Delhi nung Ato kilonser, Narendra Modi den senden amenba mapang nung lenirtem ajak tenüng nung taoba mapang Chief Minister Ghulam Nabi Azad-ia ibaji jangja-jangja metetdaksüogo.

National Conference Tir, Dr. Farooq Abdullah-i, New Delhi nung Ato kilonser den senden amenba mapang nung party ajaki peipei tebilemba lemsatepogo, ajisüaka ibaji J&K tensa atema Ato kilonseri mezüngbuba mera agiba dang lir, anungji Kashmir atema yimtenren inyakyim tenzüksüla, ta ashi.


Srinagar nung Farooq Abdullah aser Omar Abdullah nati par kidang osangbenertem

den jembiba mapang Farooq-i, "Ni ochishia shidi. India nung mezüngbuba Ato kilonseri onok dang 'plebiscite' nangzüka liasü saka nangzüka ama meinyak. Taoba mapang Ato kilonser, Narasimha Rao-i election jakdang (1996) onok dang, nüchisobo magütsütsü saka tashi agütsütsü ta nangzüka liasü. Onoki nüchiso masü saka tashi agüjang ta akhanger. Pai Parliament nung ibaji nangzüka liasü. Ibaji kong ali?. Temelung melemtep adokogo, anungji temelung melemtep aliba ya agientsüla," ta ashi.

People's Alliance for Gupkar Declaration (PAGD) teloktep meraksai lir, ta shia Omar-i, "(Ato kilonser den senden amenyong) Kechiba teloktep anentsü?" ta ashi.

Omar-isa, Kashmir nung Arrla 370 agienba ken o ya Supreme Court nung benoka liaka iba atemaji jembitsü onok dak temeden lir, ta ashi.

"Babri Masjid ken o ya Supreme Court nung mapang talangka liasü, ajisüaka BJP-i Ram tekülem ki atema maneni jembia aru. Yamaji Arrla 370 ken o Supreme Court nung liaka onoki onok tebilemba maneni jembitsü," ta paisa metetdaksü.



June 26, 2021 nü New Delhi nungi video conferencing ajanga Ato kilonser, Narendra Modi-i Ayodhya development plan senden nung adenba noksa nung angur. Iba senden nung Uttar Pradesh Chief Minister, Yogi Adityanath aser Deputy CM, Dr. Dinesh Sharma nata aden.

India nung Coronavirus samples crore 40 tendangogo: ICMR

New Delhi, Aami/June 26 (Agencies): India linük nung coronavirus tashidak jangjatsü atema samples crore 40 tendangogo; June ita nungbo anogo shia (average) samples lakh 18 dak tema tendanga liasü, ta Honibarnü ICMR-i metetdaksü.

Hokolbar tashi nung India nung samples 40,18,11,892 tendangogo. June 1 tashi nung samples crore 35 tendanga liasü.

Indian Council of Medical Research (ICMR)-i sangdong ka ajanga, "Iba alizüing tongtetba ya linük tesem ajungalen testing infrastructure aser capacity timba akümba ajanga lir," ta metetdaksü.

Tesüiba ghonda 24 tsüngda India nung nisung 48,698 dak coronavirus putet aser iba

tashidak agi shiranger 1,183 süogo, ta Honibarnep Union Health Ministry-i metetdaksü.

Tang tashi nung linük nung coronavirus case crore 3.01 jungogo aser iba tashidak agi shiranger lakh 3.94 dak tema süogo.

Tang linük nung coronavirus agi teshirangdakpur lakh 5.95 dang kümogo.

Tesüiba ghonda 24 tsüngda coronavirus vaccine dose lakh 61.19 agütsüogo aser tang tashi nung vaccine dose ajak senteper crore 31 jungnüa agütsüogo.

Tang India kübok state 11 nung coronavirus 'delta plus' variant agi shiranger 48 lir aser delta plus variant timba putetba state asemji- Maharashtra (20), Tamil Nadu (9) aser Madhya Pradesh (7) state tem lir.

Floyd tepsetsang küm 22 tepuokdak ayutsü obendang agütsü



2020 küm Minneapolis, Minnesota, US nung taoba MPD officer J Alexander Kueng matsüngdang taoba Minneapolis Police Department (MPD) officer Derek Chauvin-i temekok agi George Floyd nüngeta ayuba taoba MPD officer Thomas Lane indang body camera-i tangokba noksa nung angur.

A Washington, Aami/June 26 (Agencies): US nung okadak kati Hokolbarnü George Floyd tepsetba ken o nung aija alisang taoba police officer Derek Chauvin küm 22 tepuokdak ayutsü obendang agütsüogo. 2020 küm May ita Floyd tepsetba sülen küm aika tsüngda America nung civil rights movement tulutiba tenzük aser iba ajanga alima ajunga nung ochi obendang magütsüba temai adok.

Arishi küm 45 tain Chauvin küm 15 tepuokdak ayutsü aser iba sülen tanüngba kümtem ya pa yimayimpong dak keta lir. "Ni nüburtemi mulungba dak ajemdaker obendang agütsüba masü. Tekümdangtsü osang kar metetdaksütsü atema iba obendang agütsüba masü," ta obendanger Peter Cahill-i obendang agütsüba dak sendakba nung telangzüba agütsü. "Trial court obendanger ka mapaji ozüng shidak

benoktsü aser jurila ken o tem obendang agütsütsü asoshi lir," ta pai ashi. Minneapolis police force nung küm 19 tashi inyaka alisang Chauvin ya April ita jury kati ken o asem; unintentional second-degree murder, third-degree murder (unintentional murder caused by use of eminently dangerous act) aser secondary manslaughter dak ajemdaker aitsü.

Tir Joe Biden-ia obendang shidak agütsüogo ta bilemer. "Obendang agütsüba mapang kechisa asadang aji ajakbo ni mejangja saka tetuyuba kübok obendang tapet agütsür ama reprangteter," ta pai ashi. Biden-i May ita Floyd'er kinungertem den White House nung ajurutepogo aser Floyd tenüng nung policing reforms legislation ka benoktsü atema provision tem sensaksama liasü.

Floyd'er arishi küm tenet tain jala Gianna Floyd aser Chauvin


tetsü Carolyn Pawlenty nunger densema okadak ken o balala benoktepba sülen iba obendang agüja liasü. Chauvin tetsü lar jabasoi kecha aibelena mali ta amanger.

Chauvin-ia tang mezüngbuba okadak o jembio, "ken o talila kar benoka aliba ajanga ni tangbo onük ajaka melemsatepteter," ta pa anema federal ken o benoka aliba ateshia ashi. "Ajisiüaka ni Floyd'er kinungertem den asükhü lemsatepner," ta pai ashi.

Floyd'er kinunger tenüng nung okatsür Benjamin Crump-ia iba obendanga agütsüba pelashishia agizükogo

Taoba küm May 25 Chauvin-i temekok agi Floyd nüngsetba sülen Washington DC densema tesem aika nung nüburtemi longkak ait tenzük. Longkak aiterem "Black Lives Matter" yimyim dak ajemdaker longkak ait aser kanga kara alima linük balalai prokshia ao.

Bangladesh nung tenokdangba tesashi agütsütsü



Dhaka, Aami/June 26 (Agencies): Bangladesh nung coronavirus Delta variant menar aika küma aoba sülen sorkari Hombarnü nungi tenzük linük ajunga nung tenokdangba tesashi agütsütsü, ta sangdong ka ajanga metetdaksüogo.

Sorkar aser private office ajak hopta ka shibanga ayutsü aser medical dak sendakba nung inyakyimtem atema dang

senzüsenpongtsü melatsü, ta sorkari metetdaksüogo.

Kasa sangdong ajangsa nüburtem dang nüngdaka makaba nung senzüsenpong tali masütsü metetdaksüogo.

"Jongdak maparentem dak alia shinga kimai adoktsü memelatsü," ta kasa sangdong ajanga metetdaksü.

Health department otongdar Robed Amin-i ashiba agi,

tenokdangba balala agütsüba achaayangtsü atema police aser border guards yoktsü aser nüngdak dang süra army dena yoktsü.

"Tensa kanga mejungi kümogo. Tashidak tang maziükra India nung atalokba ama ajangshitsü," ta Amin-i AFP dang April aser May ita kidanger linük India nung atalokba ateshia ashi.

Bangladesh nung May ita nungi tashidak menar tali küma odar, kong nütsünyongtsük million 170 shi lir.

Ketdangsurtemi ashiba agi, India den arrtsü nung aliba district tem nung tensa kanga mejungi lir aser Khulna o Rajshahi yimti nungbo mozükitem tawadaddak makai kümogo.

Wara pokteter aliba ajanga Bangladesh nung jongkdak maparen dak alaka rong ajanga nüburtem belenshiba, railway aser bus service ajak nokdang lir.

Covid vaccine maginüra India-i oang: Philippines tir

Manila, Aami/June 26 (Agencies): Philippines nung covid-19 vaccine agütsüba sentong kanga meyilongi aoba ajanga kanga tezüdanga tir Rodrigo Duterte-i, vaccine maginertem tepuokdaki yoktsü mesera shiruru dak amshiba anti-parasite drug Ivermectin tutsütsü, ta shia amokmerenogo.

Ivermectin ya Covid-19 tashidak anepalutsü atema tanga lenmang ka ta ngutetogo, ajisiüaka US aser European regulators aser World Health Organization (WHO)-i iba ya amshitsü majungshir.

"Vaccine agitsü shimang, ajita mesera ni na tepuokdaki yoktsü," ta Duterte-i Hombarnü ashi. Linük yimtiba Manila nung vaccine aiba tesemtem aika nung vaccine agir ishika dang aruba osang angazükba sülen pai iba o jembia liasü.

"Na onüra India mesera America nung tesem kari oang. Ajisiüaka na iba linük nung ali tashi aser na meimchi aser nü

dak mesen mademer ta mesera vaccine agiang.

Ajita mesera ni vaccine agitsü memulungertem tenüng bendentsü atema yimdak captain tem nem tetuyuba agütsütsü. Ajita mesera ni ak nem agütsüba Ivermectin nü dak tuloktsütsü," ta Duterte-i ashi.

Duterte ya pai bilemba o jembiba atema kanga nüngtugu lir, ajisiüaka Hombarnü pai jembiba o aser health ketdangsurtem tetuyuba meputeper, shirnoki vaccine agitsüba ya pei mulungka nung agitsüla ta ashi.

"Ni jembiba o mashiyimi tangatet, kechiyong linük mepetmesü tulu nung lir. Philippines nungertemi sorkar tetuyuba mangaba agi ni teziatanger dang," ta Duterte-i ashi.

Philippines nung nisung million 1.3 tema dak tashidak potetogo aser Asia nung tashidak agi tamajungtiba kongshiba linük tem rongnung densema lir.

Colombia tir mena aliba Helicopter amak



Colombia Tir President Ivan Duque amemba helicopter nung injang agi kashiba tarak noksa nung angur.

Bucaramanga, Aami/June 26 (Agencies): Colombia tir Ivn Duque-i Hokolbarnü sangdong ka ajanga, Venezuela arrtsü len Catatumbo tesem nung pa aser ketdangsur aika mena aliba helicopter ka amak, ta metetdaksüogo.

Duque-isa, helicopter nung mena alir, pa, Defense Minister Diego Molano, Interior Minister Daniel Palacios aser Norte de Santander state Angh, Silvano Serrano nunger ajak kümzüka lir ta shiogo. Parnok ya "Peace with Legality, the Sustainable Catatumbo chapter" omen nung ajmdaker agiba sentong ka nung shilem agili liasü.

Sardinata nung tenangzüka ka ataloktsüba sülen Ccuta yimti-i oya aliba mapang tir indang helicopter maka liasü ta lisopurtem nem metetdaksüner, ta tiri ashi.

Paisa, helicopter indang equipment aser capabilities ajanga lendong tulu ataloktsü aliba nungi jenbogo, ta ashi. Tir-i lemsatepba video ka nung Colombian air force helicopter injang agi khasar aliba nguogo. Duque-i, koba mapang nung

helicopter amak mesera shirnoki amak asütsü iba indang osang kecha magütsü, saka iba tesem nung telungpurtem aika inyaksangshir.

Iba tasümaim inyakyim ajanga pai kiralongrar, ozüng raksartem aser temesepba mozü shibelenba anema raraba mesottetsü, ta pai ashi.

June 14 nü gari nung bomb inoker pokdakja military base ka amakba mapang military aser civilian 36 yiruba sülen tayimtsü oya aliba Ccuta yimti ya kanga kümddanga meita aliba mapang ka liasü. Colombia nung ketdangsertemi iba lendong shirnoki bener arutsü iba indang osang tejangja magütsü, saka Revolutionary Armed Forces of Colombia guerrillas mesera rebel National Liberation Army dak temulung meleme bilemer. National Liberation Army-ibo iba lendong dak parnok sendaka mali ta shiogo.

2018 küm Duque-i tir mapa belenzüka inyak tenzükba mapang, sorkari lokti senden nung tir amaktsü atema tasa asa inyaktsü ana nung aliba bushitsüngdangtsü ta shiogo.

AR-i Mon nung nübür nem teyari agütsü



Kohima, Aami/June 26, 2021 (TYO): Assam Rifles Civic Action Program shilem ama, Hokolbarnü (25.06.2021)

HQ IGAR (N) kübok Mon Battalion - Assam Rifles ajanga Naginimora aser iba tesem anasa Mon district indang yimtsüngtem nung alir matamabensar nem Wheelchair aser hearing aids tem lema agütsüogo, ta PRO HQ IGAR (N) sangdong ka ajanga metetdaksü.

Tangar memenep/ matamabensar alirtem, shirnok pei temang anepalutsü asoshi mozü aser item osettsüset alitsü matur, parnok nem teyari

agütsüsü nükjidong nung, iba sentong ayongzüka liasü, ta kasa sangdong nung shia lir.

Lisopurtemi iba mapatong pelashishia agizükogo aser parnoki Assam Rifles dang pelaba metetdakja liasü.

Item osettsüset lema agütsüba sentong nung, KU Naginimora, village council züngsemtem den matamabensar adianu aser kinunger tem aruagi denogo, ta kasa sangdong ajanga metetdaksü.

48buba 'Daytime Emmy Awards' osang

Los Angeles, Aami/June 26, 2021 (Agencies): Taküm 48buba Daytime Emmy Awards sentong virtual ajanga takok ngua agiogo. Iba sentong ya CBS, Paramount+ aser CBS app ajanga sayua liasü. Iba award ya 'National Academy of Television Arts and Sciences' ajanga agütsür aser iba award sentong 1974 küm nungi tenzüka agia arudar.

Sheryl Underwood-i iba sentong ketdangsüa (host) agiogo aser pungobenbuba atema lai iba sentong host asür alitsü. Presenter rongnung Drew Barrymore, Gloria Estefan, Giana De Laurentiis, Al Roker aser Mario Lopez nunger denogo.

In Memoriam' section nung Radio aser talk show host, asür Larry King bilemteta liasü.

48buba 'Daytime Emmy Awards' sentong nung takok angurtem:

- OUTSTANDING DRAMA SERIES General Hospital (ABC)
- OUTSTANDING LIMITED DRAMA SERIES Studio City (Amazon Prime Video)
- OUTSTANDING GAME SHOW Jeopardy! (SYNDICATED)
- OUTSTANDING LEGAL/ COURTROOM PROGRAM The People's Court (SYNDICATED)
- OUTSTANDING MORNING SHOW CBS Sunday Morning (CBS)
- OUTSTANDING INFORMATIVE TALK SHOW Red Table Talk (Facebook Watch)
- O U T S T A N D I N G

ENTERTAINMENT TALK SHOW The Kelly Clarkson Show (SYNDICATED)

- O U T S T A N D I N G ENTERTAINMENT NEWS PROGRAM Entertainment Tonight (SYNDICATED)

- OUTSTANDING DAYTIME SPECIAL EVENT Space Launch Live: America Returns to Space (Discovery and Science Channel)

- OUTSTANDING DAYTIME NON-FICTION SPECIAL

Creators for Change on Girls' Education with Michelle Obama (YouTube Originals)

- OUTSTANDING DAYTIME P R O M O T I O N A L ANNOUNCEMENT

Jurassic World Camp Cretaceous (Netflix)

- OUTSTANDING SPECIAL PERFORMANCE BY A LEAD ACTRESS IN A DRAMA SERIES

Jacqueline MacInnes Wood as Steffy Forrester

- OUTSTANDING SPECIAL PERFORMANCE BY A LEAD ACTOR IN A DRAMA SERIES

Maurice Benard as Sonny Corinthos

- OUTSTANDING PERFORMANCE BY A SUPPORTING ACTRESS IN A DRAMA SERIES

Marla Adams as Dina Mergeron

- OUTSTANDING PERFORMANCE BY A SUPPORTING ACTOR IN A DRAMA SERIES

Max Gail as Mike Corbin

- OUTSTANDING YOUNGER PERFORMER IN A DRAMA SERIES

Victoria Konefal as Ciara Brady

- OUTSTANDING GUEST PERFORMER IN A DRAMA

SERIES

Cady McClain as Jennifer Horton-Devereaux

- OUTSTANDING CULINARY HOST Ina Garten (Food Network)

- OUTSTANDING GAME SHOW HOST

Alex Trebek (SYNDICATED)

- OUTSTANDING INFORMATIVE TALK SHOW HOST

Larry King (Ora TV)

- O U T S T A N D I N G ENTERTAINMENT TALK SHOW HOST

Kelly Clarkson (SYNDICATED)

- OUTSTANDING WRITING TEAM FOR A DRAMA SERIES

The Young and the Restless (CBS)

- OUTSTANDING DIRECTING TEAM FOR A DRAMA SERIES

General Hospital (ABC)

- OUTSTANDING ORIGINAL SONG

"Unsaid Emily" (Netflix)

- OUTSTANDING LIGHTING DIRECTION

Odd Squad (PBS)

- OUTSTANDING TECHNICAL TEAM

Sesame Street (HBO)

- OUTSTANDING LIVE AND DIRECT-TO-TAPE SOUND MIXING

The Kelly Clarkson Show (SYNDICATED)

- OUTSTANDING CASTING FOR A DRAMA OR DAYTIME FICTION PROGRAM

General Hospital (ABC)

- OUTSTANDING COSTUME DESIGN/STYLING

The Baby-Sitters Club (Netflix)

- OUTSTANDING MAKEUP FOR A DRAMA OR DAYTIME FICTION PROGRAM

Dash & Lily (Netflix)

Kanga Dang Tebur Junga Litetba Taküm Bilemteter

Aso: 02/01/1967 - Asü: 20/06/2021
Mrs. MOANARO LONGKUMER (WAROMUNG)

"Onok nüktzü ajunga menürema toktsür ogo"

Kija kibong aser lokti kwinakati ozü dang temeim aser aria bilema wara tesashi liaka nübu, sarasadem, rongsen aser tajungshi o agi aochi temeim aser mapa tajung sayuogo nenok ajak dang kinungertemi ozü mulungjang taroktiba nungi pelaba lemsateper.

Tsüngremi nenok kija aser lokti ajak maneni moajangma ta onok sarasadem lir.

1. Olive Christian Hospital & Referral Hospital (Dimapur) nung Doctor aser Nurse-tem.

2. Naga United Village Council.

3. Naga United Village Youth members.

4. Ao Senso Telongjem Dimapur

5. Naga United Village Ao Senso Telongjem.

6. Naga United Ao Baptist Arogo.

7. Dimapur Ao Baptist Arogo.

8. Dimapur Area Waromung Senso.

9. Waromung Senso Telongjem Diphupar Area.

10. Mr. Ali Family.

Temeim kinungbu, chirnur, semchir & kinungertem.



Menungra Bilemteter



27.06.2020 ~ 27.06.2021

LT. T. TAKOSANGLA (TSÜNGCHINARO)

Onoki teti menungra aliba Otsa, tanü nai onok toktsür or küm ka ajungba anogo menungra bilemteter.

Nai onok kisüng rongjenseta toktsür or küm kaji kenü yongjia memeyongi dang süitemdaksüogo, kechiaser onok mulungjang nungi na ajemalu aser temeim mapa tajungtem kodanga amatsü makoker. Tanüa na onok den ali amai kinunger ajaki menungra bilemteta amunger.

-Temeim Kinungbo, Jala-Jabaso & Kinungertem.

In the Court

**Principal District & Sessions Judge
Mokokchung : Nagaland**

S/C NO. 94/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late Sep. T.Markaba Ao has been applied by Smti. Yajangangla Ao W/o Lt. Sp. T.Markaba Ao R/O H.No 008 Kubolong Town, Mkg Nagaland for possession of:


Family Pension, P.P.O No. 590, Closing of A/C.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 24.7.2021

Given under the hand and seal of the court on this the 24.6.2021

Sd/-

**Principal District & Sessions Judge
Mokokchung : Nagaland.**



Tuensang, Aami/June 26, 2021: Shamator, Tuensang kübok 'International Day Against Drugs Abuse and Illicit Trafficking' anogomung nüngtem nung, Honibarnü Assam Rifles - Shamator Battalion aser Regional Rural Development Agency den Yimchungrü Baptist Borü Amukhungto longjemer temesepba mozü amshiba anema awareness campaign ka ayonga agiba mapang tangokba noksa yangi angur."[8:15 PM, 6/26/2021] UwU:

**OFFICE OF THE
LONGJANG SENSO MUNG DANG**
P.O. : Impur, BPO : Longjang, Mokokchung : Nagaland

TENÜNGSANG AGÜTSÜR

Asür Mr. Temjenliba Jamir jala **Mrs. Ainla Jamir**, lai Bharatia Janata Party Mahila Morcha National office bearers nung National Secretary inyaktsü Nagaland nungi la shimtetba asoshi Senso-sanger ajak tenüng nung senso mendenti ajanga tepela lemsateper.

Tsüngremi nü taküm aser wadang tasen maneni moaja len aniangma.

Sd/-

**M. Temjen Jamir,
President,
Longjang Senso Mung dang.**

Sd/-

**Supongsashi,
Secretary,
Longjang Senso Mung dang.**

October 17 nungi 'ICC T20 World Cup' tenzüksü

New Delhi, Aami/June 26, 2021 (Agencies): Thitemer aliba Indian Premier League (IPL) final asayar sülen anogo ana lir UAE nung October 17 nungi 2021 men's T20 World Cup asayamung tenzüksü sentong renemdar.

ESPNcrinfo sangdong ka ajanga angazükba agi, T20 World Cup indang final November 14 nü asayatsü. Taoba mapang, sangdong ajanga IPL tenzüksü, September 19 nü mezüng asayatsü aser October 15 nü final asayatsü metetdaksü. Sen jenti agüja ayongba league indang franchise bio-bubble kar nung Covid-19 putetba osang jangjatetba sülen, May tetenzüklen iba league thinena liasü.

Aruya aliba T20 World Cup asayamung nung team 16 agi shilem agitsü. Mezüngbo iba World Cup India nung asayatsü renem, saka iba asayamung UAE-i belener aotsü asoshi jembia aruogo.

Board of Control for Cricket in India (BCCI)-i iba asayamung dak sendakba nung International Cricket Council



(ICC) danga tezüluba ajanga metetdaksütsü, ta kasa sangdong nung shia lir.

"Round 1, koba match 12 dena lir, iba nung team 8 alitsü aser team pezü (group shia nungi temaba team ana) tashi Super 12s atema qualify asütsü," ta ESPNcrinfo sangdong ajanga metetdaksü.

"Team 8 - Bangladesh, Sri Lanka, Ireland, Netherlands, Scotland, Namibia, Oman, Papua New Guinea nungi team pezü tashi Super 12s nung dena temaba T20I team nung adentsü asoshi temsüa akümtsü," ta sangdong nung shia lir.

Asaya 30 dena aliba Super 12s shilem ya UAE - Dubai, Abu Dhabi aser Sharjah tesemtem nung lemsar October 24 nungi tenzüksü asayatsü.

Super 12s shilem asayar sülen, playoff game asem, semi-final ana aser final asayatsü.

Taoba mapang, board senden amenba sülen, ICC-i, India nungi T20 World Cup belener aoyongjia, asayamung ayongzüksü tesem lemtetsü atema BCCI temeden (hosting rights) angutsü, ta osang jangjatsüogo.

ICC Board-isa, iba asayamung ayonger telok dang ICC Men's T20 World Cup 2021 ayongzüksü atema UAE den Middle East nung ano tesem ka bendenloksü atema asalentong yanglutsü asoshi mepishio.

"Iba T20 World Cup asayamung ayongzüksü atema ano linük tanga ka shimtsü asoshi tan ita tatemlen telemteba agitsü. Tesem koba nung asayamung ayonga asayaka, BCCI-i item ajak ketdang asütsü ta Board-isa jangjatsüogo," ta ICC-i sangdong ajanga metetdaksü

Kiren Rijju-i 'Cheer4India' campaign sangdongogo

New Delhi, Aami/June 26, 2021 (Agencies): Aruya aliba Olympic nung shilem agitsüpur India athlete tem atema, Honibarnü Sports Minister Kiren Rijju-i 'Cheer4India' campaign sangdongogo aser July 23, 2021 nungi tenzüksü asayatsü aliba Tokyo Games nung shilem agitsü alir saisponger tem pusema nungittsü asoshi pai nüburttem ajungshia liasü.

Iba Games atema India nungi athlete 100 dak tema qualify süogo aser Rijju-i ashiba agi, nüburttemi asayartem pusema kuli sayutsü atema linük nung selfie point 6000 dak tema amenoktsü.

"Iba mapatong dak sendakba nung ni Railway Minister Piyush Goyal den jembioogo aser linük kübok railway station 6000 nung tesem jangjateta liasü, kong


Olympics Selfie Point tem amenokogo," ta CII-Sportscom Industry Confederation ajanga ayongba virtual interaction nung Rijju-i ashi.

Iba campaign nung adentsü nüburttem ajungshitsü aser Tokyo nung shilem agitsüpur tem ajungmesotsü atema Haryana Chief Minister-iba symbol nung selfie ka tangoka liasü.

"India nung nüburttemi ajungai iba Olympic sentong aser asayamung indang tongtibangtem angatetsüla," ta Rijju-i ashi.

Iba virtual session nung Jalaj Dani, President Sportscom Industry Confederation; 2016 Rio Olympics nung silver medal anur Deepa Malik aser Paralympics Committee of India, President ; aser 2012 London Olympics nung bronze medal anur Gagan Narang densema tongti o jembirtem denogo.

Muhammad Ali'er semchir Nico Ali-i pro boxing atema nangzüktepogo



Nico Ali Walsh

New York, Aami/June 26, 2021 (Agencies): Taoba mapang, heavyweight champion aser boxing mongin Muhammad Ali'er semchir Nico Ali Walsh-i Bob Arum indang Top Rank Boxing nung deal ka sign süogo aser August 14, 2021 nü pai professional fight nung mezüng shilem agitsü terenemba lir.

Arishi küm 20 tain Ali Walsh, shiba Middleweight boxer ka lir, pa ya Robert Walsh aser Rasheda Ali Walsh (Muhammad Ali'er jala) na jabaso lir.

"Top Rank ka den züngzükteptsü maongka anguba ya mangdang ataloker ama lir. Kübu (Muhammad) tsüngsü nung ajemoka iba wadang maneni tejakleni bener aotsü mapang agi sempettsüba ya konang ama ni agizüker. Iba ya khuret tuluka aser iba maongka ya ni pungbapungba magitsü," ta Ali Walsh-i ashi.

Ali Walsh-i, "boxing class

nung mapang peria agüja angazüksü aser professional boxer ka ama taruba metsü mongpu (spring) nung University of Nevada, Las Vegas nungi graduate asütsü asoshi meranga inyaksü, ta ashi.

"Nico-i iba deal nung nangzüktepba ya tesüngmangtsüka. Küm aika sülen Ali'er semchir ka Pro boxing nung anioka shilem agidaksütsü onoki bilema meliasü," ta Arum-i ashi.

Arum-i Yankee Stadium nung asür Ali atema - Joe Frazier den nungtugu 'Thrilla in Manila' bout aser Ken Norton den rubber match densema fight 27 tashi ajungkettsüogo.

"Nico tebu, Ali ya fighter tajung ka liasü, ta Arum-i ashi.

"Nico-i tebu Ali tsüngsü nung anidaka takok angutsü teimla lir. Pa asayar tasen ka aser Muhammad Ali ama pa daka jakla tajung keta lir," ta Arum-i shisem.

Khel Ratna Award' atema Sreejesh aser Deepika tenüng agütsü



Deepika & PR Sreejesh

New Delhi, Aami/June 26, 2021 (Agencies): Hockey India-i Honibarnü Rajiv Gandhi Khel Ratna Award atema India tebur hockey team goalkeeper PR Sreejesh aser taoba mapang India tetsür hockey team asayar Deepika na tenüng agütsü. Kasa mapang, Arjuna Award atema Harmanpreet Singh, Vandana Katariya aser Navjot Kaur tenüng agütsüogo.

Dhyan Chand Award for Lifetime Achievement atema Hockey India-i taoba mapang asayar RP Singh aser M Ch. Sanggai Ibemhal tenüng agütsü. Coach BJ Kariappa aser CR Kumar naprongla Dronacharya Award atema nominate süogo.

Rajiv Gandhi Khel Ratna Award atema temsüa alirtem asadangshitsü asoshi January 1, 2017 nungi December 31, 2020 tashi mapang lapokja liasü. Iba küm tsüngda, PR Sreejesh-i

tongti shilem agiba ajanga Breda kübok ayongba 2018 Hockey Champions Trophy nung, India-i Silver Medal takok angu. Kasa küm, Asian Games nunga India team-i Bronze Medal ngua liasü. Iba sülen, 2019 küm Bhubaneswar Odisha nung FIH Men's Series Final nunga India-i Gold Medal takok nguogo.

2015 aser 2017 küm Sreejesh-isa Arjuna Award aser Padma Shri Award ngua lir. Ano külen India tetsür hockey asaya tsütsü Deepika-ia tongti shilem agiogo, kong la teyari ajanga 2018 Asian Games aser 2018 Asian Champions Trophy asayamung anaprongla nung India tetsür team-i Silver Medal takok angu.

Dragflick asayar takotet, Harmanpreet Singh, shibai international asaya 100 dak tema, Vandana Katariya - international asaya 200 tema

aser international asaya 150 tema nung shilem agisang Navjot Kaur nungeri tesüiba küm ishika nungi India team atema shilem tajung agia takok anguba atema, par asempronlga Arjuna Award atema tenüng agütsüogo.

National Awards atema Hockey India-i asayar tenüngtem agütsüba indang jembiba mapang, Hockey India President Gyanendro Ningombam-i, "Taoba küm Rani-i Rajiv Gandhi Khel Ratna Award anguba mapang onok ajak nümatanga liasü aser taküm Rajiv Gandhi Khel Ratna Award atema onoki linük nung Hockey asayar tajungtiba ana - PR Sreejesh aser Deepika tenüng agütsüogo," ta ashi.

"Arjuna Awards atema Harmanpreet Singh, Vandana Katariya aser Navjot Kaur tenüng agütsüba asoshi onok pelar. Tesüiba küm ishika nungi India team atema parnoki alakteta shilem tajung agiogo. India hockey tsütsü pei pei tata wadang nung shilem tajung agiba atema Dr RP Singh aser M Ch. Sanggai Ibemhal na 'Dhyan Chand Award for Lifetime Achievement' aser coach BJ Kariappa aser CR Kumar na Dronacharya Award atema nominate süogo. India nung hockey wadang renloksü aser alima jenjang den meneptepa asayatsü atema parnoki nungita aruogo," ta Gyanendro-i ashi.

BILEMDANGANG

"Tajung rongnung tajungtiba bushidang kecha agia mata."